

Na urbanistica coordinada tl raion ladin

L convegn dla Lia di Comuns à metù dant valivanzes y desferenzies dla situazion urbanistica tles valedes ladines y l debujegn de strategies unitares

“Urbanistica y raion ladin. Normes y sistems en confront” é l titul dl convegn metù a jì en sabeda passada per endrez dla Lia di Comuns ladins a Cianacei, olache i ministradours de duc i comuns dla Ladinia é vegnus enviés a scuté su i intervenc de reladours y esperc. A dauri l convegn tl chino Marmoleda él sté l president dla Lia, l ombolt de Senta Cristina Bruno Senoner, y dapò é l salut ai prejenc vegnù porté dant dal vizeombolt de Cianacei Mariano Cloch.

L’assessoura a la cultura y mendranzes linguistiches dla provinzia de Belun Daniela Templari à rejoné de paesaje y cultura architetonica desche fundament dla identité y dl debujegn de starvardé l teritore metan al prum post l bensté de nosta jent; l conseier dla Region Trentin Südtirol Luigi Chiocchetti à auzé fora l’importanza dla urbanistica, tem da tò dant te na prospetiva unitara per vedei co “proieté” nosc teritore foravia, ma ence co recuperé la tradizion urbanistica y architetonica.

L convegn é vegnù endrezé con l coordinament dl dr Luca Agostini, che à prejenté “Ladiniamap”, l projet de cartografia digitala con informazions y indicazions sun i percurs culturai dl raion ladin.

Vijions strategies per i comuns ladins dl raion dolomitch

L’architet Thomas Demetz, profesionist lede con esperienza tl ofize urbanistich de Bulsan, à metù a confront les normatives en doura ti luesc ladins per vedei ciuna che podessa ester la soluzion giuridica mioura per dut l raion, da pensé da nuef aldò di debujegns specifich de nosc teritore. Pian via da la valutazion dles condizions desferentes tles provincies de Bulsan, Trent y Belun, à Demetz auzé fora i criteres per ti assecuré

les medemes oportunités a dut l raion: competitivité y capacité de atrazion, per i ghesc ma ence per jent cualificheda che ruva a vive tl raion ladin; desponibelté de azesc y colegamenc anter i luesc ladins y da chisc a chi vejins; atenzion al ambient; prevenzion dl risch, entenù desche pericul de perde la dimenjon culturala, ma ence la capacité de renovament demografich o de bensté economich. La valutazion, aldò de chisc criteres, de elemenc critics y de azions é la basa per crié linies y strategies omogenes sun cheles che i comuns ladins sibe a una.

Tl Trentin gran autonomia a Fascia con l Comun General

L’assessour al urbanistica dla Provinzia de Trent Mauro Gilmozzi à rejoné dla situazion tl Trentin y te Fascia, olache l PUP dl 2008 dessegna na gestion en raport strent con la comunanzes locales, esprescion de na identité dinamica, acorta per la cualité dla vita ma ence per i aspec economics y dl laour. Desche ponc de cualité dla legislazion trentina, à l assessour porté dant la lege contra les secondes ciasas, l pian de svilup provincial anual y l’idea de porté i servisc tla periferia. Al é la comunanza che dezide la planificazion teritoriala locala, per chist à l Comun General de Fascia na forta valenza politica, per podei rejoné con la jent, gestì i conflic, planifiché con “sens dl limit”. Apontin l conzet de Comunità podessa ester n ejempl per i ladins ence tles autres provincies.

Bulsan y Belun: de bogn ejempli y vijions nueves

L’enjignier Anton Aschbacher dla repartizion urbanistica de Bulsan à porté dant i ejempli positifs dla Provinzia che à vedù per temp

l debujegn de na planificazion urbanistica, y ja dl 1973 à scrit dant che vigni comun enjigne si PUC. La planificazion à abù l merit de no “tré demez” teritore, de l conservé per la produzion di paurs, de prevevedi areai per i residenc y per l laour no da bacan, de tegnì la jent a vive sa mont. Olache al ne é nia sté chesta capacité de vedei dantfora él do 30 agn defec de urbanisazion da chi che an pò nia plu se paré. N auter bon ejempl de la Provinzia de Bulsan él sté les convenzions urbanistiches y les acordanzes con privac per operes publiches.

L’enjigniera Lisa Kolfink y la dotora Virna Bussadori à dapò rejoné plu avisa dl svilup te Gherdëina y dl Masterplan.

Di nuefs strumenc per l govern dl teritore tl Venet y en particular dla lege 11 dl 2004 à rejoné l architet Franco Alberti dl Servisc Urbanistica dla region. Alberti à dit che l teritore à semper debujegn de na co-planificazion y che la situazion tl raion ladin é trupe desferenta. La streda é chela de fé na rei informativa anter i ministradours di comuns ladins entourn al Sela, per crié na sensibelté unitara che chiere cie che met adum y no cie che despartesc, vardan a les ressurses dla identité (lingaz, cultura materiala, paesaje) y tegnan cont che l’architettura cogn entene la vocazion de n luech y fé mediazion anter i aspec naturai dl luech y l debujegn de chi che te chel luech viv.

La Lia, luech de coordinament dles strategies

L’architeta Paola Agostini é jita ite plu sot sun la situazion y i strumenc normatives urbanistiches ti comuns ladins de Belun: la provinzia é despartida te deplù raions, olache Ampez no é adum con Fodom y Col; vigni comun à si PRG (te Ampez à sia aprovazion damané 30 agn) y i 3 comuns à envié via la formazion di PAT (Piani Assetto Territoriale) aprovan l Document Preliminar, n document emportant che met dant valours y obietifs. I nuefs strumenc teritoriai – à Agostini dit – permetessa l coordinament di 3 comuns ladins. Coordiné l teritore ladin é na oportunité per la realizazion de n raion turistich y atratif de ezelenza y per mete a sistem ressurses (schì, Unesco), al é ence n debujegn per contrasté la omologazion, realisé modiei de governance voluntars y dezide n model de svilup siei. L convegn endrezé da la Lia di Comuns raprejeta l prum moment de encontada y confront anter i referenc per l govern dl teritore ladin, y donca pò la Lia – per cont de Paola Agostini – diventé l luech de coordinament per propone politiches, azions y projec, daideda da n desch tecnich che permete de tramudé les strategies te plans y projec concrec.

